

Lerond

I.

Pour verdure ne pour pree
ne pour fueille ne pour flour
nule chansons ne m'agree,
se ne muet de fine amour;
maiz li faignant proieour
dont ja dame n'iert amee
ne chantent fors qu'en paschour
lors se plaignent sanz douleur.

II.

Dame tieg pour enganee
qui croit faus dru menteour,
quar honte a longue duree
qui avient par tel folour,
et joie a pou de savour
qui en tel lieu est gastea,
s'en li a tant de vigour
qu'ele het sa deshounour.

III.

Fausse drue abandonnee
veut les nos et puis les lour,
ne ja s'amour n'iert emblee
que nel sachent li plusour;
maiz la dame de valour,
bele et bone et acesmee,
qui ne croit losengeour,
doit on prisier nuit et jour.

IV.

Mout m'a amours atournee
douce painne et bel labour,
ne ja pour rienz qui soit nee
ne guerpirai ceste hounour
d'amer toute la meillour
qui soit par les bons loee;
maiz de tant sui en errour
c'onques n'amai sanz freour.

V.

Bien s'est amours afermee

en mon cuer a lonc sejour,
que j'ai pluz haute pensee
que tuit cist autre ameour;
maiz li faus enqueureour
font oevre maleüre,
engiens de mainte coulour,
pour metre joie a tristour.

VI.

Dame, cele part ne tour
que m'amours ne soit doublee
et mi desirrier greignour,
dont je morrai sanz retour.

- letto 343 volte

Credits | Contatti | © Sapienza Università di Roma - Piazzale Aldo Moro 5, 00185 Roma T (+39) 06 49911
CF 80209930587 PI 02133771002

Source URL: <https://letteraturaeuropea.let.uniroma1.it/?q=laboratorio/lerond-4>